

Rau To Yoan Imbooda Muun

1 Jon

Ŋgeu to inim ataam pait ve tagham nepoon poia ila to Maaron

1 ¹Yei nivovotia saveen mata yaryaara pa ŋgeu to ipaghazonan ghiit pa saveen ve ŋgar to Maaron, ve inim ataam pait ve tagham nepoon poia. Muun kat, sawa to mbab eta ivot sone ve inim, ŋgeu tonowen inepneep. Ve ye izi inim ineep toman ghei, ve niloon saveen toni ila ye tau avo, nighita pa matamai, ve nikisi pa nimamai. Tauto nighilaal katini.^a

²Tovenen ŋgeu to inim ataam pait ve tagham nepoon poia ila to Maaron, tauto ivot ighazon ve nighita wa. To muun ve inim, yesuru Tama tinepneep. Ve aazne, ye ivot ighazon payei ve nighita. Tauto nipariaan saveen toni, ve nivotia varu payam. Leso aghur ila toni ariana, ve aneep matamim iyaryaar le alok.^b

³Tovenen mbab to yei nighita ve niloona, tauto nivotia payam. Leso yam anim alup gham toman ghei, ve itina Tamaan Maaron ve Natu Yesu Krisi talup ghiit tanim ee moghon.^c

⁴Saveen tonene, nimbooda leso itina lolood poia le poia kat.^d

Talaagh ila ghazona to Maaron

⁵Saveen to niloona ila Yesu Krisi tau avo, tauto nivotia payam. Isaav tovene ighaze: Maaron, ye ghazona tau. Ŋgar to ndoroom rita ineep toni maau.^e

⁶Tovenen ighaze tasaav taghaze itina Maaron lupun toit ee moghon, ve laghon toit, tataghon ŋgar to ndoroom, nene tataghon saveen onoon maau. Tagham kaarom.^f

⁷Ve ighaze laghon toit, tataghon ghazona to Maaron inimale ye tau inepneep ila ghazona toni lolo, nene pale itina talup ghiit tanim ee

a 1:1 Lu 1:2; Yo 1:1,14, 20:27; 2Pe 1:16 **b** 1:2 Yo 1:4, 21:24 **c** 1:3 Yo 17:21
d 1:4 Yo 15:11 **e** 1:5 1Tim 6:16; Yems 1:17 **f** 1:6 2Kor 6:14; 1Yo 2:11

moghon, ve Maaron Natu Yesu sinj toni ireu sosor toit isob ilale, ve igham ghiit tangalaanj ila Maaron mata.^g

Tangooz sosor toit malep

⁸Ighaze tasaav taghaze iit leed sosor eta maau, nene tagham kaarom pa tauud, ve saveenj onoon ineep ila lolood maau.^h

⁹Ve ighaze tavotia sosor toit ila to Maaron, ye pale ireu di itaghon ngar denjaⁱ

ve saveenj mbuaanj toni. Ngargar toit to denja maau, ye pale ireua isob ilale, leso igham ghiit tangalaanj ila mata.^j

¹⁰Tovenen ighaze tasaav taghaze iit tagham sosor eta maau, nene inimala tasaav pa Maaron taghaze ye ngeu to kaarom, ve tapatoonj tauud taghaze saveenj toni ineep ila lolood maau.

Yesu Krisi, ye Volaanja toit

2 ¹O ndinatug, you nambood saveenj tonene payam, leso agham sosor sob ve ayoon ariana. Eemoghon ighaze tamtoghon eta itap ve igham sosor, iit leed ngeu denja eez to involvool toit, ve igham avood ve isasavia saveenj toit ila to Tamaan Maaron, nene Yesu Krisi.^k

²Ye imaat inim watoonjrau, leso ireu sosor toit ve itatan mbalmbali to Maaron. Uraat toni tonowen, ye igham pa iit moghon maau. Igham pa tamtoghon tisob to taan.^l

Tamtoghon to ighaze iwatag Maaron, nene pale itaghon tutuunj toni

³Ighaze mataad kisin Maaron tutuunj toni ve tataghon di, nene irau taghilaal taghaze iit tawatag Maaron.^m

⁴Ighaze tamtoghon eta isaav ighaze ye iwatag Maaron, eemoghon itaghon tutuunj toni maau, nene ye ngeu to kaarom, ve saveenj onoon ineep ila lolo maau. ⁵Eemoghon ighaze tamtoghon eta mata kisin Maaron aliija ve itaghoni, nene ipatoonja ighaze ngar to lolood pa Maaron ineep ariana ila lolo wa. Tovenen ighaze taghamgham tovene, nene irau tawatag taghaze iit taneep tunja ila to Maaron.ⁿ

⁶Tovenen ighaze tamtoghon eta isaav ighaze: “You nanim Maaron le ve naneep tunja ila toni,” nene ye irau itaghon ngar to Krisi irau sawa isob.^o

g 1:7 Ep 1:7; Hib 9:14; Syg 7:14 **h** 1:8 Ro 3:9,23 **i** 1:9 Maaron irau ireu sosor toit sorok maau. Pasa, ye le uraat pa ingabiiz tamtoghon ve ighur atia pa sosor todi. Eemoghon sawa to Yesu imaat izala ai pambaroon, ye imbaad suvun atia to sosor to tamtoghon toni. Pughu tonene to aazne, ighaze Maaron ireu sosor to tamtoghon toni, nene itaghon ngar denja.
j 1:9 Mbo 32:5, 51:2; Yems 5:16 **k** 2:1 Ro 8:34; 1Tim 2:5; Hib 7:25 **l** 2:2 Yo 1:29; Ro 3:25; Kol 1:20; Hib 2:17 **m** 2:3 Yo 14:15,21, 15:12 **n** 2:5 Yo 14:23; 1Yo 3:24
o 2:6 Mt 11:29; Yo 13:15; 1Pe 2:21

**Ighaze taneep ila ghazooŋa to Maaron, nene pale
lolood pa tamtoŋhon ve tagham poian di**

⁷Yam nditag to lolong payam kat, tutuun to nambooda payam ne, paghu payam maau. Nene tutuun mungina. Akaria loŋaani wa. Sawa to yam aghur ila muun, ve inim aazne, tutuun tonene ineeŋ tiam.^p

⁸Eemoghon tutuun to nambooda payam ne, aazne inim paghu muul. Pasa muun, anoŋa ivot kat maau. Ve aazne, Kriŋi iŋham anoŋa ivot. Ve yam paam apatoon anoŋa ivot wa. Pasa, ghazooŋa tau to Maaron isul ariana. Tauto ŋgar to ndoroom iŋhaze isob tonene.^q

⁹Ighaze tamtoŋhon eta isaav iŋhaze: “You naneep ila ghazooŋa to Maaron,” eemoghon iŋhur koi pa toŋvetaz toni to Kriŋi, nene ye inepneep ila ndoroom lolo sone.^r

¹⁰Ve iŋhaze tamtoŋhon eta lolo pa yes toŋvetaz to Kriŋi ve iŋhamgham poian di, nene ye inepneep ila ghazooŋa to Maaron. Tamtoŋhon tovene irau iŋham ŋgar eta to iŋham tau, ma ndita pida titap ve tipul ghurla todi ne maau.^s

¹¹Eemoghon iŋhaze tamtoŋhon eta iŋhur koi pa toŋvetaz toni to Kriŋi, nene ye inepneep ila ndoroom lolo. Ye le ghilaloŋ maau. Pasa, ŋgar to ndoroom ipoon mata wa. Tauto laghoŋ toni, ye itaŋhon ŋgar to ndoroom, ve iŋhilaal ataam to itaŋhoni ne maau.^t

Saveeŋ iŋarua yes ndolman ve ndipain papaghu

¹²Ndinatug,^u
you nambood saveeŋ tonene ilat tiam pasa, ila Yesu Kriŋi iza, Tamaan Maaron ireu sosor tiam isob ilale wa.^v

¹³Ve yam ndolman, nambood saveeŋ tonene ila tiam pasa, Ŋgeu to ineeŋ muun ve inim,^w
yam awatag katini wa. Ve yam ndipain, nambood saveeŋ tonene ilat tiam pasa, yamŋa Ŋgeu Samia aparab ve alib pani wa.

¹⁴Tovenen ndinatug, you nambood saveeŋ tonene ilat tiam pasa, yam awatag Tamaan Maaron wa. Ve yam ndolman, nambood saveeŋ tonene ilat tiam pasa, Ŋgeu to ineeŋ muun ve inim, yam awatagi wa. Ve yam ndipain, nambood saveeŋ tonene ilat tiam pasa, yam ayoon ariana, ve

p 2:7 Wkp 19:18; Yo 13:34+; 1Yo 3:11 **q 2:8** Yo 8:12; Ro 13:12; Ep 5:8

r 2:9 1Yo 4:20 **s 2:10** Ro 14:13 **t 2:11** 2Pe 1:9; 1Yo 1:6 **u 2:12** Ndiran ŋgara pida tighaze saveeŋ ‘ndinatug’ tonene iza to yes Kristen tisob. Ve saveeŋ ‘ndolman,’ nene iza to yes Kristen munginadi. Ve saveeŋ ‘yam ndipain,’ nene iza to yes Kristen papaghu.

v 2:12 Mbarj 10:43; 1Kor 6:11 **w 2:13** Ndiran ŋgara katindi tighaze Ŋgeu to ineeŋ muun ve inim, nene Kriŋi. Ughita 1 Yoan 1:1.

saveen to Maaron ineep tunja ila lolomim irau sawa isob, ve yamja ŋgeu Samia aparab ve alib pani wa.^x

Lolood pa mbef to taan toman ŋgar to taan malep

¹⁵Yam aghur lolomim pa ŋgar toman mbef to taan malep. Pasa, tamtoghon to ighaze ighur lolo pa ŋgar toman mbef to taan, nene irau lolo pa Tamaan Maaron maau.^y

¹⁶Ŋgar to taan, iit tawatagi wa: Lolood igham pa mbef to uliid, mbef naol naol to taan tigham mataad, ve tapakur tauud pa mbef toit. Ŋgar tovene inim pa Tamaan Maaron maau. Nene ŋgar to taan. ¹⁷Taan toman ŋgar ve mbef naol to taan to tamtoghon lolodi igham padi, nene pale tilaledi. Eemoghon tamtoghon to ighaze itaghon Maaron lolo, nene pale ineep le alok.^z

Yes to tizorzoor Yesu aliŋa tighaze ye Mesia maau, nene tinim Kriisi koia

¹⁸Ndinatug, apatum gham! Pasa, sawa to Maaron ipasob uraat toni, tauto aazne taza pani wa. Muun, tisaav payam tighaze: “Muri, Yesu koia^a eez pale ivot.” Ve aazne, katindi tivot wa. Tovenen iit tawatag: Sawa to Maaron ipasob mbef tisob, tauto taza pani wa.^b

¹⁹Muun, ndiran tonowen tiluplup toman ghiit. Eemoghon aazne, tipul lupuuŋ toit wa. Tovenen yes avaat tamtoghon toit kat maau. Inimale yes tamtoghon toit kat, tone irau tipul ghiit maau, ve tinepneep toman ghiit sone. Ŋgar to tighami, nene ipatoon di ighaze muun, yes tamtoghon toit kat maau.^c

²⁰Eemoghon yam animale ndiran tonowen maau. Pasa, Maaron patabuan igham tau Avuvu payam wa. Ve yam asob awatag saveen onoon. ²¹You naghaze yam akankaan pa saveen onoon, to nambood rau tonene ilat ne maau. Saveen onoon, yam awatagi wa. Ve yam awatag: Saveen onoon irau inim pughu pa kaarom eta maau. Pughu tonene to nambood rau tonene ilat tiam.

²²Sei to ŋgeu to kaarom? Nene ŋgeu to izorzoor saveen ighaze: “Yesu, ye Mesia maau.” Tamtoghon tovene, ye inim Kriisi koia. Ye ipul muri pa Kriisi ve Tamaan Maaron paam.^d

²³Pasa, tamtoghon tisob to tipul muridi pa Maaron Natu, nene Tamaan Maaron ineep toman di maau. Eemoghon ighaze tamtoghon eta ivotia ghurla toni ighazoon ighaze ye ighur ila to Maaron Natu, nene Tamaan Maaron paam ineep tomani, ve yesuru tilup di tinim ee moghon.^e

x 2:14 Ep 6:10; Syg 12:11 y 2:15 Mt 6:24; Ro 12:2; Yems 4:4 z 2:17 1Kor 7:31

a 2:18 Yesu koia tonene, yes Griika tiwaata ila taudi aliŋadi tighaze “Antikrais.”

(Antikrais pughu tovene: Kriisi koia, ma tamtoghon to ipakur tau ighaze igham Kriisi ina.) b 2:18 Mk 13:6; 2Tes 2:3; 1Yo 4:3 c 2:19 Mbanj 20:30 d 2:22 1Yo 4:3; 2Yo 7

e 2:23 1Yo 4:15, 5:1; 2Yo 9

**Iit irau takis saveen onoon tunja ila lolood, ve
tataghon pooz to Avuvu Patabuan**

²⁴Tovenen saveen onoon to tisavia payam muun ve inim, matamim ingalngali ve akisi tunja ila lolomim irau sawa isob. Leso aneep tunja ila to Tamaan Maaron ve Natu Yesu Krisi.^f

²⁵Nepoon tovene itaghon saveen mbuaan to Yesu igham pait. Pasa muun, ye isaav ighaze iit pale tagham nepoon poia ila to Maaron itaghoni taghoni gha ila.^g

²⁶Saveen tonene, you nambooda ilat tiam, lesa matamim imosmoos pa ndiran kaaromja to tighaze tipaghau gham pa ataam to Maaron.

²⁷Eemoghon yam, Krisi igham tau Avuvu payam, ve Avuvu tonenen ineep toman gham irau sawa isob. Tovenen yes to tizoorndug tighaze tipatoot gham pa Maaron aliya, ledi uraat eta payam maau. Pasa, Maaron Avuvu tau ipatoot gham pa mbeb to naol ne. Ve ngar to ye ipatoot gham pani, nene kaarom maau. Nene onoon moghon. Tovenen yam irau ataghon ngar tonenen, lesa aneep tunja ila to Krisi irau sawa isob.^h

Taneep tunja ila to Krisi, ve tasaan mulaan toni

²⁸Ndinatug, aneep tunja ila to Krisi irau sawa isob. Lesa sawa to ye imuul inim ve ipatoon tau ivot ighazon, iit tamatughez pa tala tagharau sob, ve mayaad ila mata malep.ⁱ

²⁹Yam awatag: Krisi, ye ngeu to ngar denja. Tovenen yam irau awatag aghaze: Tamtoghon tisob to titaghon ngar denja, nene Maaron igham di tinim paghu, ve tinim ye ndinatu wa.^j

Iit taneep tanimale Maaron ndinatu

3 ¹Aghita. Tamaan Maaron lolo pait ve ipakur ghiit kat. Pasa, ye ipoi ghiit ighaze tau ndinatu iit. Ve saveen tonene, nene denja. Aazne, Maaron igham ghiit tanim ye ndinatu. Eemoghon yes to titaghon ngar to taan, tighilaal ghiit maau. Pasa, yes tighilaal Maaron maau.^k

²Yam ndiran tiou, lolog payam kat. Aazne, iit tanim Maaron ndinatu wa. Ve sa nepoon to muri pale taghami, nene takankaan pani. Pasa, Maaron ipaghazonan ghiit pa mbeb tonenen sone. Eemoghon iit tawatag: Sawa to Krisi imuul inim ve ipatoon tau ivot ighazon, ve taghita katini, nene pale taneep tanimale ye tau.^l

³Tamtoghon tisob to tighurghur matadi pa mbeb tonene, yes irau tigharaat taudi, lesa tingalaan ila Maaron mata tinimale Krisi tau.^m

f 2:24 Yo 14:23; 1Yo 1:3 **g** 2:25 Yo 6:40, 17:3; 1Yo 5:11 **h** 2:27 Yo 14:26, 16:13+; Hib 8:10+ **i** 2:28 Ep 3:12; 1Yo 4:17 **j** 2:29 Tit 3:5; 1Yo 3:7, 4:7; 3Yo 11
k 3:1 Yo 1:12, 16:2+; Ro 8:15+ **l** 3:2 Mt 5:8; Ro 8:29; 2Kor 3:18 **m** 3:3 2Kor 7:1

Yes to tineep tunjia ila to Krisi, tinoknok ghamuun ngar samia maau

⁴Tamtoghon tisob to tigham sosor, tiyel pa tutuun to Maaron. Pasa sosor, nene ngar to iyel pa Maaron tutuun toni. ⁵Ve yam awatag: Krisi, ye le sosor eta maau, ve izi inim taan pa ireu sosor toit.ⁿ

⁶Tovenen ighaze tamtoghon eta ineep tunjia ila to Krisi, ye irau inoknok ghamuun ngar samia maau. Ve ighaze ngeu eta ighamgham ngar samia irau sawa isob, nene ipatoonja ighaze ye ighilaal Krisi sone. Tamtoghon tovene, iwatag Krisi maau.^o

⁷Ndinatug, ngeu eta itombaam gham ve ipaghau gham pa ataam to Maaron malep. Tamtoghon to titaghon ngar denja inimala Krisi itagthoni, nene yes moghon to tineep denjadi ila Maaron mata.^p

⁸Eemoghon ighaze tamtoghon eta ighamgham ngar samia irau sawa isob, nene ye ngeu to Sadan. Pasa, muun kat ve inim, Sadan ighamgham ngar samia. Eemoghon Maaron Natu izi inim taan, ve ipatoon tau ivot ighazoon, leso ireu uraat to Sadan isob ilale.^q

⁹Tovenen yes to Maaron igham di tinim paghu, tighamgham sosor kat maau. Pasa, Maaron tapiri to igham di tinim paghu, nene inepneep todi irau sawa isob. Tovenen yes irau tinoknok ghamuun ngar samia maau.

¹⁰Tovenen ataam to taghilaal Maaron ndinatu ve Sadan ndinatu, nene vene: Ighaze tamtoghon eta inoknok ghamuun ngar to denja ila Maaron mata maau, nene ye tamtoghon to Maaron maau. Ve ighaze ngeu eta lolo pa tonjvetaz to Krisi maau ve ighamgham poian di maau, nene ye paam, tamtoghon to Maaron maau.^r

Lolood pa tauud

¹¹Sawa to aghur ila muun ve inim, yam alonloon saveen tovene: Iit irau lolood pa tauud ve tagham poian tauud.^s

¹²Tovenen iit tataghon Kain ngar toni malep. Ye, Ngeu Samia ighami inim le, tauto imundig ve irab sorokin tazi Abel imaam. Ve pughu vena to irabi imaam? Ye igham ngar tonenen pasa, ngar toni samia, ve tazi ngar toni poia ve denja ila Maaron mata.^t

¹³Yam tonjvetaz, ighaze yes to titaghon taan ngara tighur koi payam, runjamim iza ve agham ngar naol malep.^u

¹⁴Iit tawatag: Iit tapul ataam to mateen wa. Ve aazne, tataghon ataam to Maaron tauto tagham nepoon poia ila toni. Pasa, lolood pa yes tonjvetaz to Krisi ve taghamgham poian di. Ve ighaze tamtoghon eta lolo pa yes tonjvetaz to Krisi maau, nene ye itaghon ataam to mateen. ¹⁵Tamtoghon

n 3:5 2Kor 5:21; Hib 9:26; 1Pe 2:22+ **o 3:6** Ro 6:1,14; 1Yo 2:4 **p 3:7** Ro 2:13;
 1Yo 2:29 **q 3:8** Yo 8:44; Hib 2:14 **r 3:10** 1Yo 2:29, 4:8, 5:18 **s 3:11** Yo 13:34, 15:12
t 3:12 Mbnp 4:8; Hib 11:4 **u 3:13** Yo 15:18+, 17:14; 2Tim 3:12

tisob to tighurghur koi pa toŋvetaz to Kriŋi, nene Maaron ighita di tinimale ŋgeu to irab tamtoghon imaat. Ve yam awatag: Yes to tirab tamtoghon timaat, nepooŋ to mataad iyaryaar ineep todi maau.^v

¹⁶Sawa to Yesu Kriŋi ipul tau imaat pait, ye ipatooŋ ŋgar to lolood pa tamtoghon ivot ighazooŋ pait. Iit paam irau tataghon ŋgar raraate, ve tarei tauud pa yes toŋvetaz to Kriŋi.^w

¹⁷Ighaze ŋgeu eta le mbeb katindi to taan, ve ighita mbolaan igham toŋvetaz eta to Kriŋi, eemoghon lolo isamini ve iuuli maau, nene pale vena? Ŋgar to Maaron to lolo pa iit tamtoghon ve ighamgham poian ghiit, ineep to ŋgeu tonenen? Maau. ¹⁸Ndinatug, ighaze tasavsav sorok ila avood uli taghaze lolood pa tamtoghon, ve saveeŋ toit le anooŋa maau, nene poia maau. Ŋgar tovene, nene kaarom. Iit irau tataghon saveeŋ toit, ve tagham anooŋa ivot. Leso avood onoon.^x

Ataam to tayoon ila Maaron mata toman tiniid iza

¹⁹Tovenen iit lolood pa tamtoghon ve tagham poian di. Leso tawatag taghaze iit tataghon saveeŋ onoon. Ve sawa to tayoon ila Maaron mata, iit pale lolood poia. Irau tamatughez ma mayaad ne maau. ²⁰Onoon, sawa pida, tayamaan tauud taghaze taneep denjaad ila Maaron mata maau. Eemoghon poia to Maaron, nene tiina kat ve ŋgar toni ilib pa ŋgar toit. Ighaze mataad kisin mbeb ru tonene, nene pale ipalot ghiit, leso tamatughez pa tayoon ila Maaron mata sob.

²¹Yam ndiran tiou, lolog payam kat. Ighaze tayamaan tauud taghaze leed sosor eta ila Maaron mata maau, nene pale tamatughez pa tayoon ila mata maau.^y

²²Ve ighaze taghasoni pa mbeb eta, ye pale ilooŋ ghiit ve igham pait. Pasa, mataad kisin tutuuŋ toni ve tataghon di, ve taghamgham ŋgar to ighami lolo poia.^z

²³Tutuuŋ toni, nene vene: Iit irau taghur ila to Natu Yesu Kriŋi, ve lolood pa tauud ve tagham poian tauud itaghon tutuuŋ to Yesu tau isavia pait.

²⁴Tamtoghon tisob to matadi kisin tutuuŋ toni ve titaghon di, yes pale tineep tunja ila to Maaron, ve Maaron ineep tunja ila todi, ve tilup di tinim ee moghon. Ve Avuvu to Maaron igham pait, tauto igham ghiit taghilaal taghaze Maaron ineep toman ghiit irau sawa isob.^a

Taŋgabiiz poian saveeŋ to yes to tivovotia Maaron aliŋa

4 ¹Yam ndiran tiou, lolog payam kat. Aazne, propet kaaromŋa naol tilaghlaagh izi taan. Tovenen ighaze tamtoghon eta isaav payam

v **3:15** Ga 5:19+; Syg 21:8 w **3:16** Yo 15:13; Ro 5:8; Ep 5:2 x **3:18** Yems 2:14,22;
 1Pe 1:22 y **3:21** Ro 5:1; Hib 4:16, 10:22 z **3:22** Mbo 34:15; Mt 7:7+, 21:22;
 Yo 9:31, 14:13 a **3:24** Yo 14:23, 15:10; Ro 8:9

ighaze: “You navotia saveen itaghon pooz to Maaron Avuvu.” Yam aghur ila saveen toni rikia malep. Angabiiz poiani: Onoon kat Maaron Avuvu igham pooz pani, ma maau?^b

²Ataam to taghilaal yes to Maaron Avuvu igham pooz padi, nene vene: Tamtoghon tisob to tisaav ghazoonja tighaze: “You naghur ila to Yesu Krisi naghaze ye izi inim taan, ve inim tamtoghon,” nene titaghon pooz to Maaron Avuvu.^{c d}

³Ve ighaze tamtoghon eta isaav ghazoonja tovene maau, nene ye itaghon pooz to Maaron Avuvu maau. Ye itaghon pooz to avuvu ite. Nene avuvu to ipapazaagh tamtoghon ve tighur koi pa Yesu. Muun, yam aloon saveenja tighaze avuvu tonowen pale inim. Ve aazne, ye inim ivot izi taan wa.^e

⁴Eemoghon ndinatug, yam Maaron tamtoghon toni. Ve yam atatan ndiran kaaromja tonowen ve alib padi wa. Pasa, Maaron Avuvu to inepneep ila lolomim ne, tapiri ilib pa ye to ipapazaagh tamtoghon ve titaghon ngar to taan.^f

⁵Ndiran tonowen, gabuadi toman saveen todi ipatoonj di ighaze yes to taan. Tauto yes to titaghon ngar to taan, tilonloonj alinjadi. ⁶Eemoghon iit to Maaron. Tovenen ighaze tamtoghon eta iwatag Maaron, ye pale iloonj alinjamai. Ve yes to tiwatagi maau, nene tiloonj alinjamai maau. Nene ataam to taghilaal tamtoghon ve tawatag: Yes titaghon pooz to Maaron Avuvu to isasavia saveen onoon, ma titaghon pooz to avuvu kaarom to ipapaghau tamtoghon pa ataam to Maaron?^g

Ighaze lolood pa Maaron, nene pale lolood pa tamtoghon paam

⁷Yam ndiran tiou, lolog payam kat. Iit tasob irau lolood pa tauud ve tagham poian tauud. Pasa, ngar tovene inim pa Maaron. Tamtoghon tisob to lolodi pa nditadi ve tighamgham poian di, yes tiwatag Maaron. Ye igham di tinim paghu ve tinim ye ndinatu wa. ⁸Ve ighaze ngeu eta lolo pa tamtoghon maau ve igham poian di maau, nene ye iwatag Maaron maau. Pasa, ngar to lolood pa tamtoghon ve tagham poian di, nene Maaron ngar toni. ⁹Maaron imbaan Natu anonja ee moghon izi inim taan, leso igham ghiit taneep poia itaghoni taghoni gha ila. Nene ipatoonj ghiit ighaze Maaron lolo pait kat.^h

¹⁰Ngar to lolood pa Maaron ve tamtoghon, iit tataghoni iraua maau. Eemoghon Maaron, ye lolo pait kat. Aghita. Ye imbaan Natu anonja ee

b 4:1 Mt 7:15; 1Tes 5:20+; 2Yo 7 **c** 4:2 Ataam ite to tator saveen waaro tonene, nene vene: Tamtoghon tisob to tisaav ghazoonja tighaze: “You naghur ila to Yesu naghaze ye Mesia to izi inim taan, ve inim tamtoghon,” nene titaghon pooz to Maaron Avuvu.
d 4:2 1Kor 12:3; 1Yo 5:1 **e** 4:3 2Tes 2:3+; 1Yo 2:18,22; 2Yo 7 **f** 4:4 Yo 16:33; 1Yo 5:4+
g 4:6 Yo 8:47, 10:26+ **h** 4:9 Yo 3:16; Ro 5:8

moghon izi inim taan, ve imaat inim watoonrau, leso ireu sosor toit ve itatan mbalmbali to Maaron.ⁱ

¹¹Yam ndiran tiou, lolog payam kat. Ighaze Maaron lolo pait kat tovene, iit paam irau lolood pa tauud ve tagham poian tauud. ¹²Onoon, tamtoghon eta ighita katin Maaron sone. Eemoghon ighaze lolood pa tauud ve tagham poian tauud, nene ipatoon ghiit ighaze Maaron ineep tunja inim toit, ve ngar toni to lolo pa tamtoghon ve ighamgham poian di, nene ineep ariana ila lolood wa.

¹³Maaron igham tau Avuvu pait wa. Tovenen iit tawatag: Iit taneep tunja ila toni, ve ye ineep tunja inim toit.^j

¹⁴Tamaan Maaron imbaan Natu izi inim taan pa igham mulin iit tamtoghon to taan. Ve yei nighita katin uraat toni tonowen, ve nighazoon pa pughu. Tauto nipariaan saveeja, leso aghur ila toni. ¹⁵Ighaze tamtoghon eta isaav ghazoon ighaze ye ighur ila ighaze Yesu, ye Maaron Natu, nene Maaron ineep tunja ila toni, ve ye ineep tunja ila to Maaron, ve yesuru tilup di tinim ee moghon. ¹⁶Tovenen ngar to Maaron to lolo pait ve ighamgham poian ghiit, nene iit taghilaala wa. Ve taghur ila taghaze nene onoon.

Ngar to lolood pa tamtoghon ve tagham poian di, nene Maaron ngar toni. Tovenen ighaze iit takis ngar tonene tunja, ve tataghoni irau sawa isob, nene pale taneep tunja ila to Maaron, ve ye ineep tunja inim toit, ve itinja talup ghiit tanim ee moghon. ¹⁷Ighaze takis ngar to lolood pa Maaron ve tamtoghon ineep tunja ila lolood, nene sawa to Mbon Muri, iit pale leed matughezaan pa gabizoon to Maaron maau, ve tayoon ila mata toman lolood poia. Pasa, sawa to taneep izi taan, iit tataghon ngar to Krisi ighami.^k

¹⁸Tovenen ighaze takis ngar to lolood pa Maaron ve tamtoghon ariana, nene irau tamatughez maau. Pasa, matughezaan pughu, nene vene: Tamatughez pa atia to sosor toit. Tovenen ighaze ngeu eta imatughez pa Maaron, nene ipatoon ighaze ngar to Maaron to lolo pait kat ve igham poian ghiit, nene ye ighazoon pani sone.^l

¹⁹Maaron lolo ineep toit ve igham poian ghiit muun. Tauto aazne, iit lolood pani, ve lolood pa tamtoghon paam. ²⁰Tovenen ighaze ngeu eta isaav ighaze ye lolo pa Maaron, eemoghon ighur koi pa yes tonjetaz to Krisi, nene ye ngeu to kaarom. Pasa, yes tonjetaz to Krisi, ye ighita katin di pa mata. Eemoghon Maaron, tamtoghon eta irau ighita maau. Tovenen ighaze ngeu eta lolo pa tamtoghon maau ve igham poian di maau, nene ye irau lolo pa Maaron paam maau. ²¹Tauto Krisi ighur tutuun tonene pait: Tamtoghon to ighaze lolo pa Maaron, ye irau lolo pa yes tonjetaz to Krisi paam, ve igham poian di.^m

i 4:10 1Yo 2:2 j 4:13 2Kor 1:22 k 4:17 Yems 2:13; 1Yo 2:28, 3:19+ l 4:18 Ro 8:15
m 4:21 Yo 13:34+; Ep 5:2; 1Yo 3:11

Takis ghurla toit ariaja. Leso tatatan ngar to taan

5 ¹Tamtoghon tisob to tighur ila tighaze Yesu ye Mesia, Maaron igham di tinim paghu ve tinim ye ndinatu wa. Ve tamtoghon tisob to lolodi pa Tamaan Maaron, nene lolodi pa Maaron ndinatu paam.ⁿ
²Ighaze lolood pa Maaron ve tataghon tutuunj toni, nene pale tawatag taghaze iit lolood pa Maaron ndinatu. ³Pasa, ataam to tapatoonj tauud taghaze lolood pa Maaron, nene vene: Mataad kisin tutuunj toni to naol ne, ve tataghon di. Ve tutuunj toni, nene ipatajan pait pa tataghon di maau.^o
⁴Tamtoghon tisob to Maaron igham di tinim ndinatu, yes titatan ngar to taan. Ve ataam to tatatan ngar to taan, nene vene: Tayoon ariaja ve takis ghurla toit tunja.^p
⁵Sei masin irau titatan ngar to taan? Nene yes to tighur ila to Yesu tighaze ye Maaron Naatu. Yes moghon to irau titatan ngar to taan.^q

Mbeb pida to tipatoonj Yesu tighaze ye Maaron Natu

⁶Yesu Krisi izi inim taan ve inim tamtoghon, ve igham ya, ve sij toni imaliñ ve imaat izala ai pambaroonj. Tovenen ye igham ya moghon maau. Igham ya, ve muri sij toni imaliñ paam. Ve Maaron Avuvu ipariaanj Yesu saveenj toni paam, leso taghur ila. Pasa, ye isasavia saveenj onoon.
⁷Tovenen mbeb tol to tipariaanj ghiit pa taghur ila to Yesu, nene vene:
⁸Avuvu Patabuanj, ya, ve sij. Mbeb tol tonene, ngaradi raraate. ⁹Sawa naol, iit taghur ila saveenj to tamtoghon tisavia pa tipariaanj nditadi saveenj todi. Eemoghon Maaron, ye ilib pa iit tamtoghon kat. Tovenen ighaze ye ipariaanj saveenj to Natu, iit irau taghur ila kat.^r

Ighaze taghur ila to Yesu, iit tagham nepoonj poia ila to Maaron wa

¹⁰Ighaze tamtoghon eta ighur ila to Maaron Natu, ye pale iyamaana ila lolo ighaze saveenj to ye ighur ila, nene onoon. Ve ighaze tamtoghon eta ighur ila toni maau, nene ye iveleg Maaron ighaze ye avo kaarom. Pasa, saveenj to Maaron isavia pa ipariaanj saveenj to Natu, nene tamtoghon tonenen ighur ila maau. ¹¹Saveenj tovene: Nepoonj poia to isenjeenga gha ila, nene Maaron igham pait wa. Nepoonj tonowen, taghami ila to Natu.^s
¹²Tovenen tamtoghon to ighaze igham Maaron Natu, ye igham nepoonj poia ila to Maaron wa. Ve tamtoghon to ighaze igham Maaron Natu maau, ye igham nepoonj tonowen sone.^t

n 5:1 Yo 1:12+ **o 5:3** Mt 11:30; Yo 14:15,21+; 2Yo 6 **p 5:4** Yo 16:33; Ep 6:16; Syg 12:11
q 5:5 Ro 8:37; 1Kor 15:57 **r 5:9** Yo 5:32+, 8:17+ **s 5:11** Yo 1:4, 17:3
t 5:12 Yo 3:36, 5:24

¹³Saveen isob tonene, you nambooda ilat to yam tamtoghon to aghur ila to Maaron Natu, lesa awatag kat aghaze yam agham nepoon poia ila to Maaron wa. Nepoon tonowen pale iseenga itaghoni taghoni gha ila.^u

¹⁴Tovenen iit tamatughez pa ghasoniin Maaron pa leed mbab malep. Pasa, ighaze taghasoni pa mbab eta itaghon ye lolo ve ngar toni, ye pale iloon ghiit ve igham mbab tonenen pait. ¹⁵Ve iit tawatag: Maaron iloon sujuun toit irau sawa isob. Tovenen ighaze iit taghasoni pa mbab eta, ye pale iloon sujuun toit ve igham pait.^v

¹⁶Ighaze iit taghita tonvetaz toit eta igham sosor to Maaron irau ireua, iit irau tasun Maaron. Lesa igham mulin tamtoghon tonenen, ve imuul inim pa ataam to taneep mataad iyaryaar. Ve yes to tipul muridi pa Krisi ve ngar todi iyaryaan kat, nene leg saveen eta padi maau. Ndiran tovene, irau taghason Maaron padi maau. Pasa, yes ledi ataam eta muul maau. Muri, yes pale timaat ve tilaledi.^w

¹⁷Onoon, ngar samsamia to naol ne, nene sosor. Eemoghon sosor pida irau tigham ghiit tamaat ve talaleed maau.

Yoan ipasob saveen toni

¹⁸Iit tawatag: Tamtoghon tisob to Maaron igham di tinim paghu, yes tinoknok ghamuun ngar samia maau. Pasa, Maaron Natu mata padi ve ingin di. Tovenen Igeu Samia irau iwaghamun di maau.^x

¹⁹Ve iit tawatag: Iit tamtoghon to Maaron. Eemoghon ival tiina to taan, yes tineep ila Igeu Samia nima, ve ye ighamgham pooz padi. ²⁰Ve iit tawatag: Maaron Natu izi inim taan, ve ipaghazonan ngar toit, lesa tawatag katin Maaron tau. Tauto aazne, iit taneep ila to Maaron tau ve Natu Yesu Krisi, ve itija talup ghiit tanim ee moghon. Yesu Krisi, ye Maaron tau. Ve ye to inim pughu pa nepoon to mataad iyaryaar.^y

²¹Ndinatug, matamim imosmoos pa taumim, ve aneep saguan pa maaron kaarompa tisob.^z